

四庫全書

集部

欽定四庫全書

集部

一峯文集卷十二至
四

詳校官編修臣李堯棟

中書臣劉源溥覆勘

覆校官中書臣田尹衡

校對官中書臣金光悌

謄錄監生臣黃廷璧

欽定四庫全書

一峯文集卷十二

明 羅倫 撰

七言絕句詩

和林緝熙題宣和殿臨韓幹馬

夢入黃鸝紫殿陰
天津空費杜鵑心
宣和玉輦君休問
老在西風五國林

示學者

碧天如水浩無窮
萬劫消沈晝夜同
獨步鴻濛誰不死

一九光動紫微中

題梅窓四好

凍合山河骨未推

老幹
凌寒

重陰先透一陽回

孤根
得暖

東風獨

與春光首

疎花
綴玉

商鼎調羹俟子來

佳實
垂金

題李氏懷恩堂

東風何事欲沾巾
猶未全歸七尺身
一片昊天頭上立
此生長照此心真

題朋江朱望震成趣園

忽聞屐齒驚蒼苔
可是淵明歸去來
平生此老用不盡
黃金無數寒香開

答廣德太守周梁石以近體見規兼遺古琴欲
以養中和之德者

湖西風月吳江舊
廣德煙花越錦新
不是五絃傳太古
夢中誰與出天真

寄胡梅川

金精山下漏春光
雪裏春回一線陽
謝得梅花清到骨

東風長壽萬年香

題漢宮圖

白蛇中斷赤旂開
四百年中夢兩迴
惟有終南舊山色
雨餘猶自送青來

題五雲蕭氏三公五爵圖

漢苑唐宮世已空
莫將興廢語東風
人間萬事皆塵土
一段繁華又夢中

中秋日代修篤四叔作送馬生歸南海

青天拾得中秋月照破闍浮萬劫塵昨夜長風吹不斷
清光隨著海南人

蕭宜沖見陳公甫于白沙胡憲副希仁隆禮下
之海天空濶風日和暢招霞外布衣林緝熙
何時矩李德孚輩更酬互答律倡呂和綽有
雩下風致宜沖袖謁一峯山中因題其首曰
海天吟弄并續貂焉以俟于諸君

太虛雲去天無衣洞門雨斷山開扉山人莫袖東風手

指點梅花無是非

又

海天袖得蓬萊回
眼裏衡廬安在哉
三十六峯吟不盡
朱張還向雪中來

題新喻袁孝子方秦草亭

風花高下草烟青
春滿袁家孝子亭
阿母瑤池香夢杳
綵衣猶隔翠雲屏

贈隱士

此翁行坐一壺天
甲子流年大撓先
却笑君平生計拙
自家風月不須錢

送施生歸新喻

南海清風宇宙流
林何分得白沙秋
西湖一尺先天雪

韋負寒光六月浮

林緝熙何時矩皆公甫門人

示萬載彭用中陳鑑二首

倉黃紙上閑言語
寂寞玄天獨此心
桐樹未秋明月古
山童沈睡草堂深

又

淡烟疎雨野人家獨立蒼茫眼欲花籬落畫長鷄犬靜
春光恰好到桑麻

挽同年劉顯仁

丙戌同年三百五泥塗甲子是君先黃鸝莫說瀛洲夢
山下春花正可憐

贈陳壁蔡珪二首

聞道東華老秀才自將雙脚澆黃埃知君不是尋常客

解取棲雲嶂上來

又

柴門流水稻花初
城市心塵肯到無
箬笠蓑衣烟雨去
老夫依舊是農夫

題春夜宴桃李園圖贈陳粹之

春宵花月為誰明
羅綺筵中欲二更
東老倉皇眠不著
夜深還聽管絃聲

寄廬陵梁德剛歸自楚

天上人間第一家
善聲今已著中華
元龍湖海歸來日
洞裡東風醉紫霞

丙戌同年呂廷揚出令新城予尋醫盱江視之
同遊天峯老僧乞題因書於壁

淡淡閑雲野日黃
城南春服紫霞香
絃歌聲裡天峯寺
綠樹重陰午夢長

登新城令陳君員韜遺愛亭

棠樹陰陰手自栽
年年春日領春來
道傍芳草無人問

一度東風一度灰

游福山寺二首并序

福山舊名覆船山唐懿宗易覆為福宋祥符去船名
福山紫陽朱文公蓋嘗游焉寺僧像而祀之同年呂
廷揚來令新城約予同游因正其位號祀於大雄氏
之後室名曰宗正時成化十年甲午五月晦日也

雲和草樹拂天香無盡光中見紫陽萬籟一空天似水
滿船風月武夷堂

又

洗天雷雨過南山佳氣無邊紫翠間
長笑一聲空浩劫
白雲飛盡老僧閒

別廷揚

釀得新城萬頃春碧挑扶醉不辭頻
羅浮山下梅花屋
夢裡逢君恐未真

題盱守仲仁玩易軒

白髮蕭蕭思滿巾爐香不動閉關心
等閒欲問春消息

梅樹枝頭看淺深

題呂豸讀書處

好山端為此君來
竹逕茅堂次第開
曾向讀書臺上望
西風吹盡陌中埃

題饒雯峯梅二首

萬古清香橫宇宙
幾枝疎影照寒暉
玉堂不識孤山趣
長日無言對紫薇

又

六合空無一點埃，暗香多在雪中來。
柴門長日無人到，強半詩懷為汝開。

送梅宰入覲

千樹東風滿上林，九重春意待君深。
孤舟一片梅花月，照見離明萬里心。

送揚慶陳偉歸安慶二首

羅浮春色自君來，萬疊雲山紫翠開。
無限風光皆落手，袖中歸去有蓬萊。

又

浮雲殘雨總瀟然
留得羲皇太古天
明月滿船湖上路
棹歌光霽杳無邊

送張興和歸貴溪

明月春光滿釣磯
西湖今夜棹歌歸
南軒莫入東窓夢
童冠于今解浴沂

和林緝熙題瀧崖之作

流水何心苦未休
白雲依舊思悠悠
山人莫被閑花惱

只恐天翁亦白頭

與黃時憲

忽驚清露濕芙蓉
地盡燈花月正中
欲把行藏話端的

請君還拜石齋翁

寄閩中馬孝子惟一

莆人云姓高

三年蔬水如君少
一片天然孝子心
昨夜三山明月滿
不知甘露洒幽林

遊武夷偶成

權歌聲動慢亭春風景依然漢與秦流水三三山六六
古今遊盡幾多人

送蕭主事廷珍回南

塵逐西風散馬蹄江南歸思朔雲迷耳邊聞得田夫語
昨夜前村雨一犁

送人還鄉

江漢西風吹客衣滄波浩浩一舟微柴桑若問陶彭澤
不為黃花解印歸

偶書

聞道蒼生淚滿衣，病多偶與素心違。
羊裘不著寒江雪，只裏春風卧釣磯。

寄容彥昭聞兄弟欲異居

尋春何必問誰家，春事無端落暮霞。
海上東風休自老，容家庭院有荆花。

題陳粹之丙吉問牛圖

遺黎橫道劍橫天，太武猶煩問一元。
二百年終多事在，

漢家丞相本無言

贈宜黃席瑄

何處滄浪此濯纓
金牛明月掉歌亭
請君試問東流水
曾共黃河幾度清

題守村

南畝東風萬種肥
花邊烟雨上蓑衣
燈前細與兒孫約
老子生涯汝自知

寄邵武盛太守時望

亂山高下晝冥冥
樵水東頭數點青
聞道山間明月上
幾回風雨只從星

送梅太尹鼎考最行

一川楊柳萬金絲
祇與人間管別離
天上別留芳桂在
廣寒秋長最高枝

送費瑞

帶得東風萬里歸
東風無地不相隨
小窓若問春深淺
窓外桃花易滿枝

活人堂吟

藥裹匡牀白日貧
敝裘寒擁洞雲春
聞君屋外黃金杏
顆顆東風顆顆仁

風梅

調元消息在花魁
昨夜東風特地來
湖上數枝看結實
蒼生休道渴心埃

挽郁樂山

一函夜閉空山前
浮雲散盡山依然
山中猿鶴亦解語

明月長戀山人眠

壽王勁翁

碧雲門榻南山秋紅塵兩脚東門羞世上閑忙縛不得
先生已入無何遊

太極池

太極池邊草一亭水光山色上疎檉西堂風月如相問
為道南州卧不醒

慕椿堂

黃髮嬰兒百歲憂
八千辜負漆園秋
西風夢落無何有
香葉浮天玉露流

雲菴靜坐吟

獨向空山靜坐時
白雲提搆若為誰
夜深只遣山童數
月到梧桐第幾枝

丹鳳朝陽

絳闕雲霄散紫霞
丹山碧海曉光華
喚回一枕周公夢
自倚東風送落花

送符瑞還金田

一片長天一片秋
吳江分入楚江流
自來浮海無人健
莫作尋常看仲田

春融門

無端杖屨倚玄通
瑞入丹霞霽景融
海月春光收不盡
碧筒和露點東風

秋卓門

百仞玄雲風一索
吹動萬山秋更卓
蒼溟涼雲洗空青

鐵鶴夜眠猶未覺

洗心亭

一片靈臺百染汙天將明月與君孤
源頭活水依然在洗得湯銘一字無

洞虛池

洞天落落洞池虛天自如如水自如
浮象只教行不盡祇於閑處看鳶魚

雲山第一窩

金步四八全言
卷十二
風光天下已無雙
萬里雲山盡樹降
一咲出門天廣大
不知塵外有滄桑

鐵鶴亭

一笛西風夢不驚
碧天如水大多情
月明依舊南飛去
萬里玄雲片羽輕

萬花春谷二首

紫幹亭亭麗玉華
紫陽光景上袈裟
憑誰出此擎天手
剪破東風散綵霞

又

萬花庭院各春風
春在金牛繡谷中
一味東皇心事好
韶光流徧紫霞宮

半畝方塘

開破雲山第一窩
秋光無底鏡天羅
雲根一脈陽和動
添得靈源水氣和

游龍亭

金鱗玉甲青雲衣
秋聲已破東風圍
須臾變化雨天下

浮光萬古驚清輝

鳴蚪亭

青山一幅鳴天機
丹崖萬壑飛虹霓
青山莫管閑雲非
閑雲猶裹青蓑衣

橫月亭

梧桐枝上橫天飛
天空雲淨秋遲遲
書臺萬古生清暉
人心萬古圓明時

玉華峯

一柱東風戀紫霞
數聲鷄犬野仙家
東風自此無分破
添得碧桃無數花

鑑湖書屋

湖上秋光碧萬尋
吾伊聲裡日千金
莫教平地風波起
一鏡秋毫坐古今

題梅

南枝漏洩東君信
點破江南一片春
鐵笛一聲山月冷
半空飛下縞衣人

夢題王許三峯

六月霜飛萬井寒
江南烟雨此峯看
剡溪若解先生意
日日茅亭住得安

二十三日夢

歸城兒女候秋光
采采黃花泛酒觴
霜後有霜花更好
東籬留得萬年香

太極丸春

萬山蒼玉一九春
太極先生是此君
無限風光看不盡

山河全露素王身

金鼇霽雪

金鼇海上際天來
凍合雲樓霽不開
無限清光皆落手
草堂明月棹歌回

玉冕晴雲

變化無端古又今
卷舒由我此機深
時來慰滿三農望
箇裡無心是有心

翠玄幽玩

一壺光景浩無邊妙絕中和大有天自古洞門無俗客
至今留與濟川仙

大旒垂玉

一派銀河夜不收碧山無碍此天流紫雲芳草春無際
却界長天一色秋

飛輦橫翠

碧雲芳樹與天齊回首湖山萬皺低莫遣桃花逐流水
恐人疑是武陵溪

三峽迴清

三峽盤迴百里通
洞天深鎖水雲中
無邊光霽誰為主
一派銀河萬折東

一峯來秀

倚天高樹遏雲流
只見長春不見秋
曉月瞳瞳光四海
無邊佳氣擁羅浮

初四日夢

海棠流月過蘓牆
照見茅堂是玉堂
堂上真元無別主

劉郎依舊與劉郎

十一月一日將至瀧濱夕毛氏西園

太極西皇是我家碧雲長樹醉流霞玉華仙子歸來日
咲指東風第一花

初二日至瀧濱夕車溪張氏

勸君莫向青山家勸君莫向東風夸面前自有好田地
菊花開後開梅花

十二月一日夢送望振北上

鐵鶴亭前醉碧陰
金牛洞裏睡雲深
明年袖裏東風去
喚得天邊杏滿林

丹霞室

瑞入春風醉紫霞
東華光景曠西華
金墩不似仙墩好
玉鏡閣浮次第花

玄雲崖

百仞玄雲片玉清
園林風致似虞廷
只緣解得高山意
指下無音太古情

六合玄雲

東華光景儼南華六合風花屬我家
試上雲樓足清賞
與君長醉赤城霞

浴月亭

無奈清都道氣何
金波萬頃浴嫦娥
廣寒秋色深無底
一片虛雲照大羅

金牛亭

不耳牛亭夜載烟
好緣長不受春鞭
自從脫却金籠後

多在青山玉樹邊

金牛洞天

洞天風景碧虛中
九曲雲根一線通
誰向紫陽山下路
梅花三弄倚東風

二十一日夢

野仙纔割白雲房
夜靜梅花試玉香
一段春風無限力
幾翻推倒紫霞觴

二月初二日夢

次第開花次第花隔牆何必問誰家也應無奈春光好
長對東風醉紫霞

又

四海明年宇宙香萬花庭院各春光網常擔上挑三統
萬古網常上脊梁

玉柱峯

玉柱峯頭紫氣迴清明時節逼峯來只今閑却擎天手
南部烟花總自裁

五月初二日夢

陰陽管束璣衡外
宇宙呼噓橐籥中
歲事化權今在手
人間何樹不東風

三月初七日夢

高卑一曲動玄青春日
春風拜考亭不是昊天
無處著
潔魂應送水成清

九月

海天吹雨未曾收
曾上雲樓努力休
收斂此心歸寂寞

一方明月爛沙頭

十一月初三夕于杏林

天機纔動玉壺春
海內初看白日頻
頭上葛巾猶在此
與君同是葛天民

又

庭燎春和萬國香
小橋虹路倚天長
明年去借仙翁手
指點雲章對玉皇

十六日夢

彷彿雲霄玉萬竿依稀王母駕青鸞來時不識歸時路
共向瑤臺月下看

二十五日夢

月色花香掌上看分明春事滿闌干憑誰說與林和靖
雪樹枝頭雪未乾

閏二月二十六日夢

紫閣春陰倍草堂玉簫金笠戴春光從今收拾乾坤後
自對青山借一觴

十六日夢送安成醫士劉敷烈

野客歸來野興狂
水雲樓閣水雲香
鏡湖十里春如畫
一樣荷花一樣香

十月初三日夢

酒畔逢春手莫停
耳邊鶯語大分明
閑花野草春全賴
遇著東風一樣生

夢

聖賢為學在求心
為學心求古自今
回首羅浮山下屋

梅花春意一枝新

無題二首

留得一瓢收野興忽然雙鶴水之清秋風不敢吹茅屋
只恐先生夢裡驚

又

沈醉東風未得醒落花飛絮日冥冥門前有个長松樹
莫遣黃鸝來上鳴

初三日夢

黃花隨處隱天流萬壑清風一夜秋可是謫仙緣未滿
不妨還作此山囚

七月初九日夢

秋風無恙布袍輕十里西湖格樣清一片鐵心聽不盡
天津長短杜鵑聲

一峯文集卷十二

欽定四庫全書

一峯文集卷十三

明 羅倫 撰

七言八句詩

和林緝熙訪六一公于西陽宮宮有瀧岡阡表
秋日微涼草樹悲此情堪與故山離蘇黃人物從頭數
周邵風流雅未知野老自能償伏臘東風無計奈糠粃
憑君莫唱滄洲曲一淚斜陽灑卧獅

又

西傾一極論今雨頽上方歸思欲離古樹碧圓山欲斷
小窓虛白月先知滄江已老三秋鬢太古風清萬國靴
暮雨無言翁仲泣淡烟芳草對殘獅

和林緝熙書梁德莊雲菴壁

面面春光送草廬自堪蹤跡混樵漁即看風絮終無定
却愛閒雲得自如禹甸有緣憑造物楚天無夢在仙裾
人間晴雨渾閑事贏得花前到小車

遊霜崖洞天并序

文昌西山麓曰霜崖洞天洞有石船古今無知者宋
陳橫齊張習甫瀘濱張養直諸老標異洞乃以名迨
我文明少師揚士奇寺丞張宗璉侍講彭敷五繼跡
墨於戲山川自宇宙昔晦而今顯也不以人乎成化
戊戌張君兼素信次子遊用瀘濱韻各一首兼美將
磨崖刻之後之觀者亦將有感於斯乎

野人疎散便成仙自在吾心自在天紅葉為誰流水去
白雲留我碧山前烟傳桑海三生石月抱袈裟九月船

風物不殊諸老異露華無語對潺湲

贈劉善叙往湖南并引

劉友善叙將見都憲劉侯孚于湖南也其友羅倫執
蓋祝曰傳不云乎國家之敗由官邪也官之失德寵
賂章也致敗之由豈有外於此乎寵賂之章其有甚
於此乎昔和斯哈瑪爾平章斯土黜陟惟允盛德交孚
遠邇洽和交廣款服况聞周公孔子之道者乎吾子
於侯為同姓居廬陵為同郡賓西塾為同道非浚恒

之初者吾見其相與以有成也贈以詩曰

愛汝今日湖南遊長風萬里無清秋江山有待亦吾土
兄弟相看是故侯直道每增知己重老夫端為大家憂
天台舊有延生藥轉手疲癯信爾瘳

遊蕭瀧瑞賢亭次侍講彭敷五

東風清晝洗浮陰十二闌干帝汝臨一代文明元有數
二儀清濁到而今好山苦戀閑雲住秋水生欺病眼深
試問卧龍何日起禹門消息是天心

張東白往西山夏正夫訪不遇錄其作見寄予
亦約東白重遊口占元韻

金牛病客老摧隕也學山翁芋栗煨東白先生非我輩
西山佳候是良媒使君月下敲門去半夜山陰掉雪回
聞道安峯無限好春風還許緜袍陪

復廖行儉并引

行儉任金華時荷佳句見貽及是罷歸過一峯山中
倫執易集要就正于飛舉道傍一夕夢曰三才既展

却奔四雅之家千古有人大畫文王之易行儉言還
依韻酬之癸巳十月晦

登瀛道人羅浮過排風馭氣來無何千里萬里海天遠
五峯十峯春色多本相了無塵劫礙浮生虛被身名魔
大明千古曙長夜中天共指回揚戈

復新昌王直菴樂志

風騷回首盡臺輿野老烟花興未除萬壑秋聲和鳳律
一叢春色上牛車貞元自古天難老麟鳳中原網易疎

茅屋蕭然湖上榻
青山流水夢何如

送何廷秀按察河南

西風秋意滿陶園
采采黃花泛此樽
醒醉百年消日月
行藏今日任乾坤
中原藩鎮諸公在
北極朝廷萬世尊
老病多君戀明主
夢回歌枕釣蓑溫

陳夢祥歸南海內翰張廷祥憲使陳文曜憲副

夏正夫憲僉徐明德陳粹之會餞于洞陽觀

聯句寫別倫聞次其韻

長江一色楚天南，別緒無端夢與參。
百歲逢君能有幾，兩儀添我便成三。
洞陽日暮誰辭醉，陋巷風光只自甘。
極目湖山秋萬里，錦衣何處覓歸帆。

僉憲徐迂齋陳冷菴會于泰和觀臨別言懷

泰和觀裡秋光滿，共對寒香進此盃。
病骨可曾緣客醉，好懷今日為君開。
碧山白髮定誰老，黃鶴青霄何處來。
十二章還老手明朝，歸取五雲裁。

題徐迂齋匡廬秋霽圖用前韻

東南秀色甲天下無限秋光落酒盃
紫蓋黃旗山色見
光風霽月草堂開羣雄已散浮雲夢
此老猶尋白鹿來
欲剗匡廬塞彭蠡中原萬里入平裁

題徐節婦卷用張方伯韻

懶拈鸞鏡掃蛾眉羞見揚花別故枝
芳草有情還夜合
貞松無夢與春移婦人自我如男子
造化從他似小兒
一片鐵心編不盡直從刪後更無詩

西隱張氏會英圖

宇內春光領欲完名園今得萬花看幾回清夜宴桃李
九老東風入肺肝病客且扶藜杖去勸君莫放酒盃乾
不知牆外春深淺醉把花鬚仔細看

聚英堂用蕭宜沖韻

呼童連夜報青山海內衣冠此會難別段鶯花休問主
自家風月不曾閒蒼天慣我長為客野老看君亦解顏
莫學山陰便歸去短篷殘雪五更寒

答夏憲副止菴見贈二首

久病寒衾易覺秋老懷珍重為東周玄天有意緣誰在
紫綬何人為國謀月桂夜長迷玉兔銀河秋盡隔牽牛
雲山十二窩頭路多謝先生夢寐求

又

高堂明鏡萬莖秋屋上西風撼不周鑿沼且留明月住
買山初為白雲謀誰呼鐵笛先招鶴自著蓑衣早放牛
道在莫須同出處此心還向止菴求

和緝熙過毛英懋西園隱居

肝肺羸餘五畝春
草堂雲暖小山貧
塵中物色元無我
林下心情見此人
鶴伴野翁梳白髮
蝶隨春色上烏巾
褰衣細問西園老
怕有人家可並隣

和緝熙留別

甲子流年又幾春
東風初散馬蹄頻
自憐白髮添明鏡
悵望青天入暮雲
寒日卧龍遲遠夢
冷花幽鶴伴芳辰
相逢且盡樽前酒
無那滄波欲送人

唐曲江公張九齡志徐孺子碣陳獻章公甫題憲

副夏寅正夫邀倫同和憲使陳煒文曜刻石

東湖亭上聘君子季登及陳蕃禮宜侑享故

及

古往來今成代謝青山流水費興亡流連木榻堪何事
慘淡炎精遂不光文獻銘章秋月白杜陵烟艇落花香
林居細問玄冥子人道天心合有常

又

垂白西山欲滿顛漢家不遇中興年巢由事業非吾願

陳竇功名列耳邊
養笠獨堪惟飽飯
衣冠他自上仙船
平生只愛申屠子
老去相看落照前

又

黨錮諸君宿草寒
西山南浦謝盤桓
莫煩使者室懸榻
懶逐羣兒學掛冠
未有烟花嶠我老
只餘風月倩人看
生芻一酌東湖水
幾許清光入肺肝

又

聞道東都萬古悲
可堪人事與天時
羣雄睥睨嗟何及

一代人才信有裨黨籍儘教諸子與天機惟許此翁知
解嘲莫笑揚雄論誰畫陳蕃入此祠

和夏正夫題陳粹之家藏南陽卧龍圖

三分天下羽書馳龍卧南陽未起時海內風塵皆羿莽
眼中魚水是湯伊未除漢賊身先死便絕江流恨不移
曉霧一綃巾懶在青山千古笑曹丕

和夏正夫題陳粹之家藏藍關擁馬圖

金剛未破羚羊角西極流風大夏薰自分疎狂投瘴海

敢將衰朽負明君
藍關馬瘦堪寒雪
岳頂天低識暮雲
却笑元和無眼孔
鰐魚猶解畏斯文

和答涪守張蕪素

昨夜清風度碧山
蓑衣初振水雲間
流年信我添華髮
世路逢君祇厚顏
深樹黃鸝聞自語
落花飛燕傍誰還
柴門已與山童約
明月今宵不用關

又

春光容易落花輕
世路山河算幾程
芳草可憐諸老去

好風偏為故人清也知蝴蝶渾閒夢却笑獼猴亦世情
老子婆婆眠不著五更寒極弊裘橫

林緝熙歸會于薊城梁宅和洪城見寄

雲水千峯更萬峯此心期與故人同蒼茫世路浮生
澹泊春杯野興濃鄉夢幾回茅店月蓑衣無恙柳花風
明年喚取陳公甫皂帽青天信一蓬

奉寄大韶謝先生癸未南省火先生出子于厄

曾同丙子看鄉榜丙戌登科更在門南省再生真父母

西湖歸老任乾坤十年不見先生面多病難忘聖主恩
獨立蒼茫回白首滿蹊桃李竟何言

慰敷五失子

聞君失子勿深悲猶似從前無子時造物戲人聊爾耳
男兒到此不須疑東坡綠業無它累尼父前知後汝期
獨對紫薇過半夜一燈風雨讀昌黎

題張氏水村小景

逢著閑人只點頭海邊今我是沙鷗多情芳草舊知己

如意好山都上樓白髮已前渾是夢黃花相與又逢秋
年來解得濠梁意却笑遊魚誤中鈎

和緝熙同春書臺

萬玉峯頭自在春暖雲晴雨為誰貧誰知別樣風花手
只屬簾衣淡蕩人芳草漫同康樂夢野花羞傍紫陽巾
即呼猿鶴留君住莫問東家更買隣

和緝熙謁文信公富田祠

杖屨春光滿一峯文山猿鶴若為容乾坤卧榻還他主

伏臘謳歌信野翁
夷夏有情回白日
興亡無計奈西風
簷花落盡燈前雨
懶聽南禪半夜鐘

題薊城梁德剛書屋用林緝熙韻

乳燕鳴鳩甲水濱
小軒幽邃足聽聞
坐忘芳草翻疑夢
寒盡梅花剩得春
世事暗隨燈燼落
年華偏戀老翁新
芒鞋竹杖身長健
頻上金牛醉野人

送張魚素北上并寄大韶明仲敷五諸君

文昌人物張魚素
來謝涪州太守回
無數青山容我有

幾多黔首待君來
朝廷今日真無事
草野它年愧不才
傳語諸君憐老病
餘生留取付春杯

答陳石齋二首

海上歸來臥一丘
烟霞萬頃勝封侯
青山未老我長樂
明月不來心獨憂
雲谷耦耕添此老
華胥高枕是吾州
蒼天鼎鼎憑誰在
笑倚東風自點頭

又

帝與華胥作睡侯
天厨無分飽珍羞
友朋愛我垂高誼

妻子耘春不解憂十載驅馳歸故里兩年漂泊落它州
草亭風雨瀟瀟處却為蒼生白滿頭

寄謝元吉

曾見西湖柱史歌長歌三日遏雲和雷霆白晝果在地
牛女清秋無渡河淮西草木色不改衡陽花柳春何多
幾時攜取陳夫子淡月疎烟醉碧蘿

唘頭次容彥昭先祖妣葬地處

唘上三峯高倚天斜傾北斗飛寒泉野鳥啼吟古蜀帝

寒花的皦羅浮仙龍山自落烏紗帽馬鬣新封翠玉鈿
萬古清明風木在淚河東注下伊川

次陳公甫九日韻

三千里外傳佳句兒稚爭歌九日詩黃菊有知催我病
蒼天無定使人疑烟霞落夢還多日月露回秋候此時
獨倚柴門搔白首南山佳氣接東籬

瀧槎吟為彭汝正

萬里瀧源天上來乘槎仙子幾時回客星午夜犯牛女

烟雨一竿歸釣臺
白髮未消湖海氣
清風半入雲濤堆
蓑衣醉卧黃昏後
一枕江聲鼻息雷

一橫亭

一篷烟雨待君來
憑席風濤日幾回
尼父已虛浮海夢
傅巖初用濟川材
一亭真意留芳草
兩岸春光付野梅
老子羊裘方卧穩
棹歌休傍釣魚臺

又

孤舟端為濟川開
載滿東風傍釣臺
魚飯情懷渾落魄

雲天光影共裴徊
浪拋柳絮春無定
醉卧蘆花夢未回
玉漏不知催幾許
早行人已待君來

和彭敷五二首

聞道東龍居士來
湖山寂歷湖光漼
破除塵海夢一覺
消得羅浮春幾杯
今雨城南驚老樹
東風竹外見全梅
青山莫笑空回首
紫錦囊中萬玉堆

又

五柳先生歸去來
芰荷衣上露漼漼
不由天地不由我

無盡烟花無盡杯，別樣家風幽澗竹。一般春意隔牆梅，
老來只怕風濤險。懶下瞿塘灩澦堆。

謁草廬先生祠

道契山中訪有初，草廬祠下掃寒蕪。六經日月渾無夜，
萬古真元自此符。黃閣夢回空北極，紫玄雲淨小東吳。
補天功課誰能就，密鍊玄精倚太虛。

送曾郎中約義歸致

解印悠然歸故林，南山佳氣忽千尋。浮雲世事從今古，

芳草人間自淺深，萬壑清風玄鶴夢。
一天秋水白鷗心，憑渠領得東周意。
莫和山前楚鳳吟。

復陳公懋

年年九日登高處，野老悲歌可奈何。
籬落秋香簪後少，關河春草望中多。
浮雲萬里天慳雨，明月千川水漫波。
閑得百年懷抱在，白頭林下看蹉跎。

戲贈明仲弟

明仲天庭中鶴頂紅一點
嘗云須學明道

看君即欲看明道，無那蒼生福未緣。
鶴頂漸紅朝日表，

蠅頭初黑退花前官閑儘爾還詩債老去堪誰送酒錢
莫道府中無職事閉門猶自抱風眠

次易德元

青天飛下青山蒼山光無盡天茫茫赤脚仙人九節杖
一日拄盡青山長物外逍遙混沌老空中語笑雲霞香
黃鶴高飛在何處蜻蜓猶逐東風狂

成化丙戌夏五月予得罪謫泉南提舉道經金
鰲門生彭宜鑑夢中有作意若為予者時九

月二十一日也

牆角寒梅昨夜開誰知春在雪中回松筠到處為貞友
桃李漫山總俗材清影不隨流水去暗香時逐好風來
冰肌玉骨無人識先占千紅萬紫魁

遊紫霄觀

兩袖西風上紫霄古碑磨蘚認前朝黃塵滿地孤雲在
紫極中天萬國標不為丹砂逃日月且緣新火問漁樵
何人更結華山屋泉石中分正道寮

復江浦張都憲二首

聖主憂勤稼穡難
大臣忠奮亮天官
日邊紅杏春前種
海上黃茅夢裡觀
玉殿薰風清社稷
冰壺秋月照心肝
東籬無限秋光好
留與淵明晚節看

又

萬鼎橫天玉鉉扛
堯波導海息春撞
秋飛野草青千里
春遞鸞花滿萬邦
雲外鳳毛真有侶
海邊鷗鳥信無雙
功成南紀標銅柱
自見聞風萬壁降

復且齋

朔風鶴氅來湖濱雪中草樹生陽春浩歌一曲泣神鬼
浮漚萬古同天人雲霞拂袖海岳動花月在戶乾坤貧
鹿門回首忽千里蒼茫獨立傷吾神

迂齋為徐僉憲題

對人長笑野夫狂未到東周氣不降閒夢苦疑天未穩
緩行猶恐地無綱滿園春意無羊到一枕風清為蝶忙
露冕若逢當道虎幾回車上臂先攘

正密堂

一片靈臺莫自欺此機纔動山翁知秋毫不染銘盤日
夜半無人秉燭時香燼上薰玄宇動冰壺清沁玉淵輝
紫陽心印傳千古笑指南山未許移

一峯草亭

病來久謝乾坤勞白板霜飛安所遭千峯不管甲子老
萬竅一任天風號麋鹿過門看箇箇野翁餽藥來忉忉
百年有意堪誰道檢書日夜燒松膏

來賢堂

曉天光霽動千山回首英靈見二難
鐵鶴夜留玄露飲金童朝煮白雲餐
筆頭瀾湧文翻水鏡裏春回酒上顏
誰在青霄望牛斗可教長劍倚虛寒

張元惠藥酒

藥和雲液效方神日日山妻泣四隣
食旨自知非宰我獨醒誰信是靈均
誰將鷓杓分餘滴欲脫鸛裘換一巡
忽報白衣人送至玉壺持送曲江春

洪峩閣

百雉玄城架沈寥玉華仙宇鬱岩堯丹書北斗玄光合
黃道中天紫氣饒泮水載陽秋月皜清風歸洞野雲消
梅花閣上春如海鐵鶴仙人放玉簫

二十六日夢寄饒雯峯太守

好雲乘雨到雯峯一片閒雲度大空故國有懷天角白
小窓分睡日頭紅秋拋兩鬢蓬髻外春在三生落魄中
此老曾懷無畫手杏花庭院柳花風

夢和人慶先考初度

宇宙千年老八荒不知更變幾滄桑
黃花三徑秋風早白髮一簪生意長
雲母屏前歌皓齒牡丹亭畔試沈香
浮雲一任閒舒卷贏得青山望渺茫

足隱

五柳先生歸去來陶然獨對菊花盃
巢由不識君人面伊呂徒勞王佐才
蓑笠每披烟雨去牛羊幾放夕陽回
錦袍公子莫來此門對南山日懶開

初八日附黃圭夢

兩儀會得真鉛汞，助破陰陽妙物機。
明月滿天秋似水，東風一樹柳如絲。
萬家赤子庭中泣，半夜青雲枕畔飛。
雷電若驚龍便起，大施霖雨洗瘡痍。

十八日夢

海上歸來十五秋，西風無計白人頭。
九中化主先生在，物外年華甲子流。
丹竈一方仙客護，玉階方寸昊天留。
南山佳氣無邊在，天壽蒼生樂未休。

又和同春書臺

翠錦雲山信手裁
光風消息自天來
人間好事傳千古
海內長春此一盃
河漢昭回傾北極
寒泉膏潤麗東萊
丹霞百尺虹光動
昨夜奎星落上台

一峯文集卷十三

欽定四庫全書

一峯文集卷十四

明 羅倫 撰

歌

湖山萬里歌并引

益菴陳夢祥僉江西憲事考滿歸南海冷菴陳粹之
同寮而厚別送攸鎮驛益菴寫湖山萬里圖以寄情
子為之題

光霽湖天月滿舡
棹歌聲裡鐵腸仙
棹歌聲裡日如年

歌聲一透鴻濛堅歌停雲散山依然歌韻初傳滿大千
渭城三疊流空烟湖山一曲江天連潁川老子歸田園
桑麻萬頃東風妍蓑衣箬笠犁鋤邊芒鞋竹杖風花前
麻衣草座南陽阡石頭玉板東坡禪人間官不直一錢
四時青紫西風蟬至今薄俗違高賢夢祥骨鯁知誰憐
我獨擊節非諛便粹之瀟灑輕肥鮮益菴冷暖寒無羶
手持鐵杖來扶顛兩公脊硬當皇天金蘭氣味同心言
海天夢落烟霞先西江忽上番禺船乾坤瘡痍誰當痊

天河莫寫中幽悃，冷菴回首別袂褰。
益菴落筆驚龍眠，湖山萬里離情牽。
湖山萬里一幅箋，冥鴻天濶鳳孤鶩。

靜棲巖歌并序

靜棲巖舊名聖棲巖，蓋佛子之居也。去廣昌十五里，在吉祥里北石山壁立如翠玉屏，風下有洞穴深廣圓瑩，可容百數十人。竒山秀水環繞左右，邑人揭黻氏闢荆棘，造廬舍，延叔父蘭憲先生主之。叔父曰：非靜無以成學，易其名為靜棲，命留題刻石，遂斐然成。

章使後之高人大隱知靜棲之名發乎蘭窓叔父也
叔父名曰修益

混沌神工劈天斧鑿破鴻濛開太古青天碧玉一萬仞
玉宇玲瓏紫虛府綠雲繞梁丹霞繡柱明月掛簷清風
入戶琪樹扶疎瑤草綠白鶴回翔紫鸞舞王喬來遊傳
說築堵左手撫蓬壺右手挾天姥貝闕珠宮等是閑洞
天福地羞與伍揭陽有佳人好事過謝五邀請羅浮仙
來作靜修主饑餐紫芝渴飲玉乳春陽融融液肝腑天

葩燿燿奇芬吐日鍊五色石萬杵玄霜苦借問爾何為
欲把青天補仙人本是好閑居却憶蒼生思下土君不
見山前婦人哭嗷嗷為道淫雨無時休

節婦歌并序

節婦姓某氏父某年二十配某氏三載其夫卒子一
人甫五歲亦卒或勸其改配者節婦哭曰此言何至
吾耳乎吾聞婦之事人從一無二吾生為某氏婦死
為某氏鬼矣聞者惻惻毛豎於戲婦貞其夫子孝其

父臣忠其君是皆出於秉彝之性天柱賴以立地維
賴以固者節婦比有之忠臣孝子鮮聞焉豈婦人能
之而丈夫反不能哉欲動乎中而所守變乎外丈夫
有愧於婦人多矣若節婦者惡可無聞哉予故傳其
事而播諸聲歌使觀風者有所采也

泉流不歸山雨落不上天妾心死不回金石無全堅白
日經中街飄忽沈西海妾心日不如長夜瞳瞳光不改
明月懸清輝三五二八圓又虧妾心月不如一圓耿耿

汗泥沙回首天漢上雙鳳縹縹凌紫霞蓬蒿仰面空咨嗟

竹溪歌為南雄陳壁先考賦

大庾嶺頭梅花所出氣壓羅浮名動月窟潁川遺老冰雪風骨嗚呼梅花花中之儒先天下之春胡為不友而友此君此君虛直是此老之心術此君標格是此老之精神娑娑鸞鳳影變化蛟龍身睿聖與齊德俗士不敢親翠雲一萬丈白日搖蒼昊蒼雪灑六合祝融回朱輪

姑射仙人冷偷眼廣平學士冰生唇晉七賢唐六逸一
年三百六日日日日來傾三百盃脫帽露頂此君側玉
山自倒非人推竹溪處士今何在半夜還騎綵鳳回

和夏憲副止菴賦陳粹之冷菴赤壁圖歌

赤壁一萬丈不為浮雲裹崢嶸蘇長公豪氣蓋九州東
華塵土浣汗脚摩弄雲海浮虛舟山高月小自今古小
人虫蛆君子龍虎東風赤壁一炬紅千載曹劉兩丘土
我耳不欲聞何客吹洞簫山林杳冥鳥獸悲號風塵瀕

洞欲拔腰間倚天劍陸剽蛇豕水斬鮫鯨手挾南溟鵬
足躡飛雲履仰天發長嘆自把太虛擬轉眼五百年冷
菴好畫止菴賦江西二妙世間無倒腔翻作蘇仙圖橫
江孤鶴夢若醒人間軒冕真泥塗

挽張方伯

嚴霜殺碧草白露晞青苔美人一去不復來秋風白帝
孤猿哀為君一掛劍枯樹生春華斗間紫氣芒寒斜隆
君萬壽天無涯

定王樂用冷菴歌

君不見淮陽城君不戀曲江景君不味羅珍羞君不皦
衣裳錦君居冰一壺君出雪一艇千山寂鶚聲萬境絕
塵影道有凍餓人冷菴無此冷我寒待君衣我饑待君
省民瘼不問問牛喘莫學漢家丞相丙冷菴冷冷如鐵
萬國如在紅爐中江南六月寒風雪恥菴好向冷菴遊
冷菴好傍恥菴結菴外諸君知不知兩菴裡事乾坤歇

集成蘭

衆當路我空谷無人而自芳無風而自馥上師魯雙下
友靈均隨分山林吾亦足蕭艾如不知栽傾自培覆

靜觀堂

靜觀堂上本無我九曲玄中更有天隻眼已拋桑海外
萬象忽落鴻濛前秋橫古月鶴初定春枕白雲山欲眠

鳳棲丹穴

栖栖坐斷梧桐枝雲衢文翰光陸離朝陽聲動羣鴻悲
高崗影落寒山輝八月霜飛秋氣淒秋巖雨滴空垂垂

鳳兮鳳兮今來儀滄江白髮歌明時

龍卧滄濱

白雲飛盡寒潭清空山草木流芳馨秋日雷霆震復驚
春風頭角深潛形蛟人夜泣清湘碧驪珠曉吐滄波明
瀧濱瀧濱明發靈八荒淨洗天瓢傾

冷菴歲寒幽趣圖

君心虛君節剛君性直君色蒼可深山可巖廊可春陽
可秋霜此君所以為三友之一流萬世之芳

夢送張萬禎

寒蟾影落光天中，巨艦艤衝野水東。
桂溪隱者禎菴翁，草鞋路遠朱門通。
雲天悠悠光景融，裴回杖屨酣東風。
桃李無言朝露滿，五雲沾路春光濃。

題邑史艾方師存機軒

艾宣昔日丹青學，寫遍朝家及臺閣。
孤標雅操自天成，敢與諸黃較強弱。
雲孫自少心孔開，挾藝過我羅浮來。
一峯山人忽驚訝，筆奪造化非常才。
緬思今代老吟伯。

詩載牛腰富能得展圖示我雲錦章盡是功名天上客
金牛野老誰與論窮經棲雲鎖洞門云胡索我寫長句
安得好手如右軍諸公袞袞難趾美空唱巴人汙君耳
思君此去名愈香何異彩鳳鳴朝陽會當上國寫御容
天子穆穆侯皇皇

贈畫史艾方師

有容貌古鬚眉蒼靈臺倒湛秋天光運筆通神超顧鄭
潑墨無迹齊黃王為子揮灑一峯亭雅懷一段何可當

金牛洞府玄雲間分明移來靜觀堂觀之無厭愛無足
此人此畫今無雙變化無窮杳難測妙無言分紙一張
行看應詔賓上國麒麟閣寫鴻鴈行



一峯文集卷十四